

Nominado di Poder di Hubentud, Kenneth Vrolijk:

Locual mi kier mira mas, ta hende grandi habri man pa mucha muestra kico nan por



ORANJESTAD – Kenneth Vrolijk ta un hoben di 20 aña, cu recientemente a wordo nomina pa su prima pa participa den e competencia “Poder di hubentud” den entrevista cu Bon Dia Aruba e ta conta tocante su trabou como un coach y cual cambio e lo kier mira den sociedad.

Vrolijk, kende a caba di haya su propedeuse na Universidad di Aruba y ta cla pa cuminsa studia ley. Den su tempo liber e ta fungi como un coach pa muchanan di e team di basketball Estrella Aruba Lions. E ta conta Bon

Dia Aruba cu e miho parti di ta un mentor pa esunnan mas chikito ta cu e muchanan aki por ta productivo riba un veld na luga di haci cos di mala mucha riba caya. Tambe e ta subraya cu e tin 5 aña ta haci trabou di coach caba.

Hubentud na Aruba
Ora e ta yega na hubentud di Aruba, Vrolijk ta pensa cu sociedad riba su mes kier pa hubentud ta mas involvi den tur cos. Pero tin hopi hoben cu tin miedo di ta diferente y esey ta haci cu nan ta keda cera y no ta muestra tur hende locual nan por.

Tambe Vrolijk ta subraya cu e lo kier wak hende grandi ta un poco mas habri pa scucha muchanan y hobennan pa asina nan por muestra kico nan por. Tambe pa cuminsa compliment hoben ora nan ta yega nan metanan of ta logra algo. Pasobra hopi biaha sociedad

ta sufi di pone hobennan den un luz negativo y keha tocante nan comportacion so. Mientras cu hopi tiki ta wordo haci ora nan ta destaca den sociedad.

Bira abogado
Manera ariba menciona, Vrolijk kier studia ley y bira un abogado. Bon Dia Aruba a puntra Vrolijk kico a inspira su persona pa scoge ley como su estudio. E ta conta cu desde chikito semper e tabata masha interesa den programanan manera Law & Order entre otro. Y esaki ta locual a inspira su escogencia den carera. Pa motibo cu pa studia ley di biaha bo mester un diploma di VWO y Vrolijk tabata tin un HAVO, el a haci FEF cual ta basicamente economia.

Y awo cu e propedeuse e por cambia direccion y tuma ley cual ta locual e di berdad kier haci.

Poder di hubentud
Como nominado pa cu e competencia Poder di Hubentud, Bon Dia Aruba a puntra Vrolijk kico e ta pensa di proyectonan asina, pa cual el a comenta cu e ta haya proyectonan asina hopi bon pa hubentud.

Den su mesun palabranan: “Mi ta haya e ta un bon idea



pasobra e meta di e proyecto aki ta pa guia hoben cu den hopi ocasion ta tras di cortina. Muestra nan e direccion corecto pa medio di diferente cursonan pa mehoracion. Y tambe ta duna nan e sosten y aprecio cu nan merece.”

Manera Bon Dia Aruba a menciona prome caba, E vision di e proyecto aki ta pa stimula y pa apoya hobennan logra nan metanan. Tambe pa yuda hobennan crea metanan concreto y duradero. Pone hobennan compromete na un nivel personal y profesional. Un lider cu por educa y comparti y inspira hobennan den comunidad.

E hobennan cu ta resalta y ta wordo selecciona lo wordo invita pa participa na un di e cursonan cu mensualmente lo wordo treci dilanti pa entre otro FADA, Wit Gele Kruis, Famia Planea etc.

Durante e luna cu e hobennan wordo selecciona, nan por manda nan storia via un Pagina di Facebook tocante con nan ta contribui na un of mas persona den comunidad. Riba 12 di augustus di 2015 lo anuncia dos hoben cu lo gana e premio “Poder di Hubentud”.

E premio pa e hobennan aki lo ta un premio na balor di 5000 florin pa contribui na nan desaroyo, e proyecto lo conta cu 7 categoria cual ta: Social, Arte y Cultura, Educacion, Deporte, Trabou Boluntario, Innovacion, Comunicacion (media y tecnologia). E categoria cu e hoben ta wordo nomina aden no mag di ta un tarea diario di e hoben of su profesion. Si un hoben a yega di haya reconocimiento anteriormente no ta wordo exclui pa participa pero tin cu wordo scogi pa otro categoria. □

